


वाख  
व्यथ मा छि शॉंगिथ

बिमला रैना



---

Transformed into Standardised Devanagari-Kashmiri Script by  
M.K.Raina, Vasai, Mumbai with due permission from the author.

My sincere thanks to her.  
Work completed on 12.02.2005.

---



Bimla Raina

१

प्वख्तु कारु पोत हे निशि दरबारस  
म्वख्तस रँत्नन बर मव माल ।  
नॉल्य लालु मालु शाह सवारस  
रोज़ राज़दारस नॉली नाल ॥

२

सथ सथ बोलुवुन सतुता यिये  
म्वख्तस रँत्नन निये ख्यथ ।  
ह्यनु रोस दिथ गछ रोज़ि नु फिये  
सासु नोव सँहज़ु वति दिये गथ ॥

३

सँहज़ानंदा सँहज़ु वारे  
अमृतु नारे छकुवुन रूद ।  
सासु बज़ु विगनि नोमरिथ कारे  
लछि बज़ु लालु मालु दिथ गँयि सूद ॥

४

जम जम नार लोग नरकस नार वुछ  
स्वर्गुक्य द्वार वुछ यलु गँयि तौर्य ।  
शोज़ बोज़ प्रक़च्च स्वर्गुक द्वार मुछ  
हेरि बापार वुछ ख्वख सोतु ब्रौर्य ॥

५

मनुक मोनुम लोगुस फांसि  
काँछर वाँसि करुन प्योव ।

अकलि वनुन यस प्रोन्न काँसि  
माँछर छाँछि नोव ज़न ज़्योव ।।

६

शब्दाह सज़े पोज़ाह पज़े  
अपुज़ दज़े पोत हेयि यम ।  
आगुर वुज़े सागर ग्रज़े  
हागूर वज़े ज़ीरु बम ।।

७

नेशब्द हशमतु सेमंज़ वनस  
दोश बोज़ मिलुविथ दोल तय नाल ।  
तमहुक्य काड वॅड्य वॅड्य मनस  
ज़्वनस फिरिथ गाडन ज़ाल ।।

८

स्वखन डुस्य तु यड नो बरन  
दुखु कि दगि हरन आय ।  
स्वखुक ग्रौड सासि लटि मरन  
दुखय छौड नोव ज़न ज़ाय ।।

९

नॅविस नु नव्यर तु नोवुय रेश  
हिव्य न्युव होश तु पडा प्योव ।  
अथन नु लोर दंदन जोश  
लॅछुन लोछ छछि ख्योव ।।

१०

सम्सौर्य वानय खेयि कृत्य ब्रमन  
सँमिथ समन काँत्याह जाय ।  
वांगुज देह पुछ्य मुहिमुत्य गमन  
कँह मोर्य चादर ख्वखलिथ द्राय ॥

११

पछि प्रोचुम येछि योछुम  
वछि वॉलिजि कोतुम रथ ।  
वॉल्य् वांदुर ज़न मे नोचुम  
अदु मोचुम वतु गथ ॥

१२

हारि नु पचुन व्वजुम खार  
मोर्य खेयि हार ग्वडु बोर क्याह ।  
वांगुज वॉरिस तु दारस तार  
मनुनि नु नार म्वरदन बाह ॥

१३

लो लो करान ललुवुम मे ते  
स्वते स्वते गौडुन नार ।  
बाँज्य गारन बाँज्य दिन्न ल्वते  
मे छ्वचि वते लोगुम तार ॥

१४

व्वंदय व्यौदिम व्वंदय मौदुम  
व्वंदय वँदिथ वुछुम ज़ूल ।

फुलय फोलिथ फलाह छौदुम  
फरिकि फहा पॅयिथ दूल ।।

१५

पॉन्य पानस पानय तोलान  
पॉन्य पानय शिन्याह मूल ।  
नारु ब्रेहन शुन्या शोलान  
पॉन्य पानय पनुन गूल ।।

१६

सुचनि पाव्यन पानाह सुति युस  
मति मॅतिस व्वद्मय ।  
ग्र्वकु ग्र्वकय अखाह गितिस  
स्वचर सौतिथ सोदा म्वय ।।

१७

सु दय सॉदिथ मद् पान वोलुम  
शिनि बोलुनोवुम सन ची तार ।  
हन के हुमन हुरि कर्म खुर ज़ोलुम  
हर् रुमय पोलुम दर्मुक सार ।।

१८

सौतय ज्वन दियि जॉव्युल ज़ातस  
ज़ुल ज़ख क्युल च़ालि जुल्मातस ।  
संगर मालाह फ्वलि मंज़ रातस  
सॉलाह वॅरिथ यियि कायनातस ।।

१९

पीरु सुंद वनुन युस थवि वने  
कल करि मने द्यन क्योहो राथ ।  
जॉविलि सॉविलि ज्वनु युस सने  
तँस्य् अदु नने हदि जुल्माथ ॥

२०

हदाह च्रँटिथ नदाह वसान  
सदाह रोस्तुय वसान शोन्य् ।  
गाह छटान स्वंदर मालाह  
स्वनाह वथरुन सासु दोन्य् ॥

२१

शॉनिस वॉनिथ ग्वताह मोर  
अथय खारे दुरय लाल ।  
डालि राजु हंसस तारि अनुवारे  
कुलि जहानुक मुशीरि माल ॥

२२

स्वनु दनु सन्य्च्यथ बॅर्यज़ि डबन  
आयस वॅन्यज़ि कॅर्यज़ि क्याह ।  
अन्न ख्यन वॅहरुक बॅर्यज़ि गबन  
शाहस वन्यज़ि कॅर्यज़ि क्याह ॥

२३

सैकि डोर्यन सग द्युन रावी

डुलु डारन रावी ब्योल ।  
मनत्यखन सँन्य कथ रावी  
अनिमस रावी ऑल तु खोल ॥

२४

दून्य दूनिस वुचे वुचे  
रज़ाह गँडनम मूनिस ताम ।  
वोवुर्य वूनिस रचे रचे  
सुचे कपटस नोव अंदाम ॥

२५

शाह बँनिथ अछ द्वारिकाये  
न कुनि दानुच ति बँर्यज़ि प्रय ।  
सति ह्योर आगुर शिव गंगाये  
तथ सगुवानस ग्छ्यज़ि लय ॥

२६

प्रँज़ ज़ॉन्य वुछिवन चेनख तते  
मखमलस येते हौंदुर नार ।  
सासु बँद्य गुहोशल प्रज़लान अते  
शाहमार स्वते म्वते व्यचार ॥

२७

गाशिल्य गाह त्रोव गॉबिल्य ग्वफे  
ज़ॉव्युल ज़रबाफ हॉव्युल गव ।  
नॉविथ नव प्रॉविथ छ्वपे  
अ-ब्यनु वुफे अमृथ चव ॥

२८

येम्य युथ मोंगुस तस त्युथ पोच्युय

पॉन्य पानस हे च्युय न्यफ ।  
पॉन्य पानस पानय व्योचुय  
क्यथु लगी संसॉर्य काच्चे च्यफ ॥

२९

वॉट मनाह खोतुम बारि  
कोताह चारि सोदागार ।  
नफच्युन्य खार नखि खॅच्च हारि  
तोताह कारि गॅडिथ खर ॥

३०

च्युय दीवु आसुवुन दीशि दीशन  
कुनि मीशस च्यु ना खॉल्य ।  
च्युय तॅपिथ तपु रीशन  
देहु वस्त्र च्येय नॉल्य ॥

३१

पम्पोश छॅतुर ती छुस वीगिस  
म्वनि पीटस प्यठ तस जाय ।  
प्रवु कोफूर रंगु तस जूगिस  
जिंदु मॉरिथ नोव तति आय ॥

३२

प्वन्याह ज़ेनुन पनुनिस रतस  
गीर्य गतस ने ज़बॉन्य लोग ।  
वॉताह ह्योन असली सतस  
नाहकु क्याह हतस कलाह दोग ।

३३

बूगु ब्वछिरय दयस पूजन

क्रंज नालय रँटिथ साल ।  
मॉल्य् पोथरन दासाह रोजन  
बेछि कतरन सौतरिथ बाल ॥

३४

तन मन नावुन त्रु संद्याये  
बवुन्य् अंदर बडि आगूर ।  
स्वनु सॉव्य् सपदन र्वपु कायाये  
तति हेरि जाये ललवान नूर ॥

३५

सतु यूग्य् सनन अथ वॉरागय  
गथ मूक्ष प्रावान समि सीमाब ।  
राजु यूग्य् बूगु बलु डलि प्रयागय  
तामसु यूग्य् दमु ज़न सथ वुछि खाब ॥

३६

त्रुमाह वॉयिथ बाह पूर्य साज़स  
राज़ाह बँनिथ चवान दाम ।  
तीरुक तछुन तनि बाज़स  
सँनिस राज़स हेयि कुस साम ॥

३७

सतुत्य् दिगु दिज़म रंगन  
ह्यंगन कोरुम पोशि पॉराव ।  
यिथ्य् तुथ्य् मंगन ज़ंगु व्वंगन  
सौबरिथ सम्यव राज़ाह ज़ाव ॥

३८

रोश दुयितिस मानस अज्ञानस

ख्वश अपमानस तु ज्ञानस रोज़ ।  
माछुक मेछर कुनुन रोज़ वानस  
कँव बोज़वुन अँदुर्य दानस रोज़ ॥

३९

पोन्य पाताल अंबर पानय  
सिर्यि चँद्रम कुलि बुतराथ ।  
जीवु ज़ाँचन वावु नचानुय  
ब्यन तस कुनि छे नु अख ज़ाथ ।

४०

मॉरन ह्यचोम लँब्य लँब्य पकुन  
छ्वकुन द्युतुम ह्यकुन प्योम ।  
ग्वरन हाव्योम नाबद टकुन  
कथव वखनुम अथव ख्योम ॥

४१

म्वलुर्यो! म्वल ज़ान म्वलुलिस पानस  
मायायि ज़ाल विज्ञानस सुत्यु ।  
ज्वल च़ठ च्यथ फिर अँदुर्य दानस  
च्यतु रस चथ ति अबिमानस कृत्यु ॥

४२

मँछ्युल माज़ वथुरुम मेचे  
रचे रचे द्युतुमस दाह ।  
सतव पूरिथ हतन प्रेचे  
तच़र तते मुछिमस खाह ॥

४३

हसर कैह नो संसौर्य मानस

दानस युथ ज़न शेश्तर ज्युन ।  
पोन्य ज़न सारव रुमि दार बानस  
ख्यन ज़न लागि अँहनाजन कुन ॥

४४

ज़लुर्य ज़ाल वॅलिम पानस  
कानस दरे मॅरिम शाल ।  
खर गँडिम गॉव गानस  
बानस छँडुम बाह कुर्य दाल ॥

४५

छ्यटन श्रोचन खेयस शकव  
त्रकव ख्योम ककव माज़ ।  
मुलुख तुलुम यलव रूखकव  
फ़वकव हूरिथ गॅयस बाज़ ॥

४६

कृनुन कौडुम मै वानु वानु  
मे पॉन्य पानु पानस फोर ।  
कल कर छलु गोर चावान पानु  
बु मे म्योनुय मनस ठोर ॥

४७

तन कोफुर रंग क्वंगु प्रवन  
मनु गोड दिस ज़वन व्वथुराव ।  
नाव, गुथुर लोसन नु ज़्यवन  
अंदु अँजरिथ व्वंदु सथुराव ॥

४८

प्राण उकवनु कुकिलि गिति वुठुम

दमु अमुकुय द्युतुमस ठोट ।  
प्रान फुकुवनु सोथ दिनु पोतुम  
ब्रम ख्यमुकुय ओतमस मोठ ॥

४९

न्यबर हॉविथ अंदर मॅशरोवुथ  
ब्रोंत कवु थोवुथ मायायि काल ।  
वटुन अय ओसुय क्याज़ि वाहरोवुथ  
बय कवु थोवुथ फहि यमु ज़ाल ॥

५०

चोनुय अनहार आलुम्य् ऑनस  
छुख व्वपुदॉविथ करान मार ।  
लागि रोस शुब क्याह चंदुकिस गॅहनस  
बागि रोस बेयि अथ दिवान नार ॥

५१

मेछर नेरि नो डाकु मुजन  
मेच्चि टुजन नु मकायि सोत ।  
म्वख्तु व्वपदिनु वीरि कुजन  
शीन बनि नु नारु तोत ॥

५२

नोंग तमि नो ठोर दिनु वावस  
किथु थोप दियि कावस कांह ।  
ग्रख यस लागि अंदुकिस बावस  
पुनिम तस नो मावस ज़ांह ॥

५३

सृष्टियि अंदर मायायि मंदर

मूर्ती अंदर पॉन्य पान ज्ञान ।  
शाह सॉर कर पानस अंदर  
सु च्युय अंदर फिरिथ द्यान ॥

५४

लोलुकि तोलु दरु हर मेलानय  
कनुवुन सु पानय बन खॅरीदार ।  
कल कर मॅल्ह्य ह्यन मनु प्रॅच वानय  
जैवि कर ठानय कर मु इजहार ॥

५५

डबि नोचुम छ्वन्य गव स्वबरु  
खबर हेचुम कनन याम ।  
छ्वन्यस तम लोग सोजाह जबर  
सोरुय बय तय बु कुस ताम ॥

५६

नैदरि अँदरय क्रखाह लायान  
अथव वायान नगारु डोल ।  
सोपुन्य संज स्यथुर छायन  
हुशॉर्य ह्यसव दिथ गछि दोल ॥

५७

हाँकल दिचुम संसॉर्य गबस  
नबस खोरुम हा तय हू ।  
तमाह मोहरुम नफुच्य बबस  
द्वबस त्रोवुम कूद तय मोह ॥

५८

दयि दयायि रँहबर बेटे

कोछ्छ द्युन लोलु ल्वंगुन्यव माल ।  
आत्म गूल सुय रटि व्वटे  
तस कति मटे संसौर्य ज़ाल ॥

५९

ज़्यव लूसुम मंगान मंगान  
तोति मंगनु थँचिस नो ।  
नरि गजम मोर रंगान  
ब्रोंह हनाह ति पँचिस नो ॥

६०

कुस ओस नेह ब्रॉन्न फेरान नदहरि  
वँक्य् ऑस च़ँटमुन्न च़ँदुरय माल ।  
तसुय स्वखाह यसुय र्यदु फरि  
युस गव फिरिथ अंदुर्य लाल ॥

६१

न स्वरुन न परुन  
न मरुन न ज़्योन  
न ख्वशी न खरुन  
न खोन न छोन  
न वदुन न ज़रुन  
न खँटिथ न नोन  
न फटुन न तरुन  
न सियाह न प्रोन

६२

मदुक मोदरेर कोरुथ वेथे  
बदस दिच़ुथ अंदर जाय ।  
स्वनु थोद म्वल अँकिस प्रथे

हतस कथे कुनुय दाय ।।

६३

सैंदरि बाला स्वंदर शीरिथ  
व्वंदर फीरिथ पेमुच्च माय ।  
बंगु ज़न मँच्चरिथ गोमुत नीरिथ  
बाज़ाह हूरिथ आमुच्च प्राय ।।

६४

बहा खँस्युतन सतन नबन  
पान्युक हसर गल्यस नो ।  
आत्म अँच्च्यतन लँन ब्यबन  
रछु ति हना डल्यस नो ।।

६५

वनन मंज़ लाल  
बाज़ नियि फोतन ।  
चँट्यतोस ज़ाल  
सिरिथि खोतु ज़ोतन ।।

६६

डचकुकिस लीखिस मख नो च़टे  
आयस ब्रुंज़ाह छुवटे नु ज़ांह ।  
मछि हुंज़ि पखि येटि नाव नो फटे  
वेथि किथु आंगलि रटे कांह ।।

६७

मखमँल्यु बागन हून्यु छरन  
लबरन जरन स्वन तु लाल ।  
ह्यनुर्य बलन, वेंदुल तरन

गोबुर्य रतस रटन माल ।।

६८

ज़िंदस करान शी शी दूनय  
माज़स राज़व बँरुस माय ।  
बस्ति बँरहस तोमलु गुनय  
हँस्यतिस खँसिथ ओखुन्य दाय ।।

६९

यंगय मुश्कि अंबर छटे  
रुंगस क्वंगस कर्या मान ।  
जाँहिल बेबि किथु सिर्यि खटे  
ऑलिम ऑलिमस गछ्या फान ।।

७०

कृहरिस मनस लाकम दिचुम  
मँहरिथ च्यतव कँडिमस तान ।  
दँहरिस पानस ताह ताह पुचिम  
प्रतव मोचुम देह रोस प्रान ।।

७१

ग्वगर सॉरिय अंदर त्रोपिम  
लंगर लेजन गजन ठान ।  
अन्न थुर मंथुर यंथुर श्रोपिम  
दातु अदु ज़ोनुम आत्म ज्ञान ।।

७२

युथ नो डलख कुनि नो कैह छुय  
अँदुर्य पलन ह्यख क्याह साम ।  
नेबरु अँदरय यँद्रियन बेह छुय

पनुन्य रेह छय पानस तान्य ।।

७३

दूखस जाय येम्य नो दिच्युय  
स्वखस प्रुतिय येम्य नो बर ।  
म्वखस च़ाश येम्य नो हेच्युय  
गीता तमी प्रानव पर ।।

७४

हंसय बूल्य हंसव पॅरुम  
हंसन कॅरुम पॉरी ज़ान ।  
हन हन गॉलिथ हंसा गोरुम  
हंसय वोरुम ला मकान ।।

७५

अँछन गटु ज़ोल युसुय कासे  
बे ख्वद देह निशि युसुय गौव ।  
तॉल्य ज़्यव ठँठरिथ अमृथ फासे  
गॉल्य गंडु ज़ेवि कंडु तॅमी चौव ।।

७६

बंदन माल गँडुम हले  
च़ोखुर्य बस्ति छले कुस ।  
व्यंदन व्यंदन श्राख तले  
मॅरिथ मरन फले मुस ।।

७७

दंदु बर्यन व्यपन अँज़  
तोमलय दँज़ छटु वाव ।  
ग्रटिनि दोल ग्रटस संज़

गाँटु मुठिस स्वनुक बाव ।।

७८

चटुख सॉरी संसॉर्य बसदन  
छुख च्नु पनुन व्यंदन कस ।  
प्रान प्रानन प्रानुय वंदन  
नाहकय लोगमुत शींकिया मस ।।

७९

व्वखुल्य् नाव लाकम अथस  
व्वखुर्य वतन कथन सोज़ ।  
पखुच चॉरिथ पयि किस रथस  
वायुक वसवास त्रॉविथ बोज़ ।।

८०

अन्यव अनिरय वुछुय नौनुय  
ज़र्यव ज़रिरय बूज़ुय सथ ।  
कल्यव कजिरय मनस खोनुय  
त्रु वॅकर्य प्रॉविथ परमु गथ ।.

८१

लोलु लालुनि म्युल कर लालन  
ब्रम बोज़ मॅशरिथ गरु संसार ।  
ल्वलि ल्वलि ललुवुन च्वशवुन्य कालन  
नूर फ्वलि बालन पूर ब्रह्मसार ।।

८२

अज़ुय स्वरि युस पगाह फ्वले  
वले संतोशुक अँतलास ।  
छय स्वथ यस कालय डले

खले खलस तस डुबु डास ॥

८३

लछस कुलुफ तु वछस छाव  
म्वखस म्वहर मनस ताव ।  
त्रदि च्यथ ब्दि ग्राव  
ब्यंदु दय सेंदि नाव ॥

८४

रुश दुय चरचुन मनस मोशुम  
ग्रटु बलु पिशुम पनुन पान ।  
पान्यर त्रॉविथ परस पोशुम  
हरस हेछिम लागुन्यु प्रान ॥

८५

अटु कॅरिथ जंडु बार्यन  
सेपि पॅहर्यन र्वपु गछ ।  
बर वॅथिय मुंगुर्य दार्यन  
गाँटु ब्रार्यन क्रुलु पछ ॥

८६

कावु गाटुल तति नो चलन  
फॅर्य फ्यलन वॅर्य मॅहलाम ।  
त्रुक्यन त्रॅचरिथ तुतुर्य कलन  
जंडु बलन क्वंग तु बादाम ॥

८७

शाह रजि रजि वस पख जेरि जेरे  
यँदुर फेरे कतुन कूठ ।  
च्वदुश चँद्रम चोरम नेरे

अमृत वेरे च्चँदर्युन म्यूठ ।।

८८

वोन याम दिच्चोम ताम गॅय ग्वतन  
सासव कथव द्युतुम ब्रख ।  
सोन गव सोरुय वोन आव गतन  
बास लोग प्रथन ह्योतुम थख ।।

८९

खँड हार लयि मा गिंदु क्याह ज़ारस  
जराह दितिम बॉज्य गारस कुत्य् ।  
बंड दित्य् नागन टख द्युत तारस  
दँह दँर्य वसि कुस गारस सुत्य् ।।

९०

मारुकि बये लहा खँत्य् पानय  
नारुकि लये दँज़िथ गौव सूर ।  
कार तु करतूत सन्य्च्यथ ज़ानुय  
वार मा वनुनस दारु गछु दूर ।।

९१

दयस वॅम्य् प्रुछ ओनुत कते  
मनु वुजमले कस लागि वौत ।  
पय यस यियि तवु कवु नो मते  
अन्न वेज़ गले बवु च़लि ब्रौत ।।

९२

वेहरु कथ गोख हा म्यानि पानो  
वान छुय म्वकुल शेरुस दोर ।  
वॅहरि कयामत मॉर्यफति ज़ान हो

हान छय होरुन्य मूरुख खोर ।।

९३

सोपुन्य आयोम दूहु अकि राज़य  
साज़ ओस ह्यथ सौबुल शेरान ।  
दोनम छिय मा बिय किनु ताज़य  
माज़न तस यस गुल पौरान ।।

९४

रुम रुम कॅहलिथ रुह म्योन च़ले  
मछि मछ़बंद डले म्योन ।  
मेच़ि म्यॅच़ रले रछ़ रछ़ गले  
अदु क्याह फवले नोव नतु प्रोन ।।

९५

सतन सैदरन थाव्योम ब्वनुय  
दोव खोत वनुय नोनुय द्राव ।  
मोर ओस मेच़िथ म्वर्दय ख्वनुय  
नोथ गव गोनुय छोनुय द्राव ।।

९६

हँदुर्य शाह हेतिम अँदुर्य  
स्वखु ब्रारि स्वखा वुछुम नु कांह ।  
सैदुर गॅयम लूबचि नैदरि  
हँल्य् टॉर्य अँछ फिर्य वुछुम नु ज़ांह ।।

९७

बॅरगु बॅरगु नीलोफरस  
बिहिथ सरस करान राज ।  
पाँचि म्वखु रँटिथ गरस

वाँन्य वरस गँडिथ ताज ॥

९८

ब्राँत्य् गँयम ब्रमय सरस  
वाँत्य् दितिम बरस ताम ।  
खूत्य् दितिम खोंखुन्य् थरस  
शेश पंजि दरस वादय खाम ॥

९९

नगरु नगरु छँडिम वन हा  
वनु कस सना वुछुम क्याह ।  
नब्ज नब्ज कँरिथ फना  
अदु कथ मना करे ज़ांह ॥

१००

मनु हटु मन रोटुम कचे  
तारचि तूलुम तु रँटिम कन ।  
दबु दबु वॉलिथ श्रोपरिम मेचे  
वनन कुनिरिथ बन्यव स्वन ॥

१०१

अँदुर्य अँदुर्य अंदर गराह  
गरस अंदर समंदराह ।  
नलु वटि रोस्तुय द्वसि बराह  
जाफुर्य मवहरि स्वनु हॉर्य थराह ॥

१०२

वनु लोग मेलाह ख्यनु रोस पानस  
मानसबलस गौडुख ज़ूल ।  
ताह ताह रंगु रंगु आयस्तानस

लंजि ब्वन थानस ह्योर कुन मूल ॥

१०३

जिंदु पानु आयस मरन मरन  
ग्वरन पेयस ख्वरन तल ।  
हरन कोसुम द्दुर लरन  
जर्यर ज़रन कौसर बल ॥

१०४

किथु शाह गोमुत नॉल्य् अरज़ोलुय  
कवो छुख लोगमुत वालु वाशे ।  
ज्यतु मर स्वख द्वख ज़न अरुखोलुय  
वेह व्याज़ रिवान ज्यनु बाशे ॥

१०५

पॉन्य् पानय कुस छुख ब्याख  
पानय खाक पानय कुज ।  
पानय ज़ाख पानय प्याख  
पानय श्राख पानय पुज ॥

१०६

दीशन दीशन दितिम वॅनी  
मे ज़ांह नु कुनी अथि अदु आम ।  
मनस दितिम पवनुन्य् पॅनी  
अदु अंदु कनी तीर्थ द्राम ॥

१०७

सत् ख्वगु कलि ख्वगु प्रथ ख्वगु बनी  
दियि मनस युस युथ दाय ।  
लछि बॅद्य ख्वग अदु कति ननी

च्चशवय गुनी हर खगु ज़ाय ।।

१०८

शंकरु जटे चंद्रम रटे  
शिव शहस कस प्युल दान ।  
वन छा खसिहे छटि छटे  
हू हा नु तस मिलविथ प्रान ।।

१०९

लयि गछुन तु नयि म्वचुन  
त्रेयि नचुन अंदर दान ।  
फहि गछुन कहि प्रचुन  
सुय वचुन आत्म ज्ञान ।।

११०

त्रुकून्य् आरु तपोस्थानु  
त्रयि अर्द पानु स्यंदयबल ।  
पूर्ण चंद्र शिवु अंदु पानु  
शुन्ययिकि स्थानु सहस्रदल ।।

१११

आनय दिचुन अँदुर्य ऑनय  
स्वनय वगुव तु र्वपय खाव ।  
खोटिस खँटिथ वुज़ि क्यथु व्वहनय  
मोर रॉज़्य मँरिस रिंदु जिंदु द्राव ।।

११२

कुलुफ मुचरिथ व्वंदुकिस डबस  
अँदुर्य नबस लागि व्यस्तार ।  
तारख मंडुला जून बिहि गबस

सिरिं सबि तय ज़गि ह्यसुमार ।।

११३

लछि बोद शहन ज़्योव  
शाहन सासु बोद ख्योव ।  
कुन प्रोन तु क्याह नोव  
कुस ज़ाव तु कुस गौव ।।

११४

क्रेंकु बलु मनु सारि हंसा ड्युंठुम  
पोशि नूल बोज़ि बोज़न तार ।  
नज़र पिलिथ थज़रु ब्युंठुम  
रोशि होशन च़ीतन गार ।।

११५

अँलिफु अंदर हय  
मीम दाल मदु वाल ।  
फुरनय वज़ि नय  
गनि होल ननि लाल ।।

११६

नन्यर सोरुय नोनुय हॉविथ  
सन्यर लबुन पानस ताम ।  
ज्वनुक ज़ान्यर कंदे सॉविथ  
मनस रॉविश ह्यनस साम ।।

११७

ऑनस ऑनस मंज़ ज़ाँपानस  
बिहिथ पानय तुलिथ डूल्यु ।  
नँन्यु कथ ज़ॉन्यु वोन क्या अनज़ानस

वॅन्त्यु शेछ पानस वुठु वॅल्यु बूल्यु ।।

११८

कवु नो पानि अँदरी फोटुख  
किथो रँटुथ व्वखुर्यु नाव ।  
ह्वदु हरि पोत गरि हँत्यु हून्यु च्छोटुख  
ज्यवव छोटुख मोदरि बाव ।।

११९

कर्मु कोरव यस कर्मस फरे  
दर्मुकिस दारस दियि क्याह पो न ।  
नक्द नु सोदा पोन्न कवु जरे  
वुछिवुन कोतुर बुछिनय ओ न ।।

१२०

कपुस्यु कुलिस क्वंग नु ब्वन  
नफुच्च्यु राजस दी दी रॉस्यु ।  
द्यानु मूनिस ति म्वख्तु नोवुन  
बानन तँछिथ दानन खॉस्यु ।।

१२१

अँगनु क्वंडन स्वन जरन  
म्वख्तु प्रवे हरन ज़न ।  
रुवपु सँदरस नावि तरन  
सरन अमृथ बरन वन ।.

१२२

ताजस सब्ज प्रवु प्रवन  
पद्म पद्यन प्रज़लन लाल ।  
साज़ु साज़ंदर छिस ग्यवन

वतन वथरिथ गुलि गुलाल ।।

१२३

कैहन ब्रख तय कैहन तौरी  
कैह अथु मूरान ख्यावान फ्यख ।  
कैह गॅयि नॅख्य ह्यथ कैह अटु बौरी  
कैहन यौरी करान छख ।।

१२४

कथन मंगुस छ्वपि हुंद बाश  
क्वठ्यन मंगुस बिहुक जोश ।  
अँछन मंगुस वन्युक गाश  
कनन मंगुस ज्वनुक होश ।।

१२५

जप हिरि गॅनिरिथ यलु गव दरय  
आगुर वॅछमुन्न लछि लंजि बून्य ।  
अपोर पॅरिथ कूठ के सरय  
आज्ञायि मंडलस रंगय दून्य ।।

१२६

सब्ज नागा मंज कोहु आरस  
जुत कर मा टाल वुठ मुहु ज़ाल ।  
राज़ हंसा गछि पॅजि तारस  
लौछल ललवान करिय माल ।।

१२७

बुबर खसान येते त्रागस  
मागस येते श्रावन जोश ।  
चँदुचि प्रेवि लवु तते बागस

आगस प्रेयान तिमय पोश ।।

१२८

दुहुचि गटि तय रातुचि प्रवे  
कवु नो शिवस च्नेनान छुख ।  
युस तति मूद तय सुय येति ज़ेवे  
सुय दवु दवे तँस्य अदु च़ुख ।।

१२९

टुकु टुख यस च़ँज सुय स्वनु कंदे  
स्वखय सँदे करे राज ।  
बदरस लोग यस तस क्याह अंदे  
दँथरि कलस अँथरि ताज ।।

१३०

रंगय आरच्च क्वंगु कोस्तूरी  
हंगस स्वनु म्वख्तु जूरी छख ।  
रूशिथ कवु छख कस छख च़ूरी  
संसौर्य ब्रह्मसौर्य लेतरे टख ।।

१३१

गिंदुवुन जंदु मा द्युन अरुखॉलिस  
वगि गुर आगुहन वुज़िथ गव ।  
पहि रोस रथ गव अथु दिथ पँहलिस  
डाक़ुवोल नाहक़ वति फाक़ु फारि प्यव ।।

१३२

कावु शुप्य ज़्यव कड लवु फिर लालन  
संगेमालि प्रोव बालन गाश ।  
ओम पन प्वख्ताव म्वख्तु तरि मालन

शंखु हेछ ज्यव दिन्व तालुक बाश ।।

१३३

ब्वदि हुंद दूद चे क्वदु कड पानस  
मानस बलास कर पौराव ।  
श्वद वानि श्रान कर ह्वदु शीश दहानस  
बागि यिय पानस तिय वर्ताव ।।

१३४

रेशव राशि यिथ रुह रंबुनोवुख  
गिदिथ बोवुख अंदुक गाश ।  
अंदु वंदु, बंदु बंदु, व्वंदु रंजुनोवुख  
राशा छोवुख तु असि क्युत बाश ।।

१३५

जूग्य् रोगि रोगि यिथ रेशुताह होवुय  
सीनु बँ सीनु राज़ बोवुये ।  
ग्वडु ग्वरु वाखाकनु परुनोवुय  
नैद्रायि आसन प्रोवुये ।।

१३६

शिवन शक्ती ग्युंद छ्यपु छारे  
शेवस शहन गँयि मिलुवन ।  
स्वरुनय साज़ा ह्यथ ग्वडु सारे  
राज़स करान साज़ु मिलुवन ।।

१३७

जूग्य् द्रायि मंज़ आरु वारे वारे  
वशि ह्यथ वशिनव सुत्पु बारुवन ।  
माया मौंड ह्यथ त्रोगुनि दारे

त्रुवॉर्य तारे ज़गि डुलवन ॥

१३८

सत्तु पूर्य लरे अर्य पॉठ्य चाये  
कुठ्यन कॅरुख बॉग्य बॉगरन ।  
मॅत्य बीठ्य लोत्य पॉठ्य पनुने जाये  
शिव रूद हेरि शेरि रज़ु अँलरन ॥

१३९

मायि आयि वर कोड कारि कायाये  
कामस ह्यथ चोल काचु बोर ज़न ।  
ब्रह्म क्वंडु श्रान कर छलु मायाये  
संतोश अर्गु पोश त्रन बालकन ॥

१४०

कूदु ज्युन मुहु स्युन रन वासुनाये  
कर्म क्रोत रुत रुत बल दियि ख्यन ।  
जॉन्य गव ज्वनु प्यथ ज़ानुनुकि आये  
कशि कोडुन गशि ज्वनु डाकु डॉनि कन ॥

१४१

बलु बाग्यवानस द्रायि त्रपु वारे  
आत्म गव परम आत्म ज़न ।  
कोन ब्यूठ अँन्य पॉठ्य रंगु पहारे  
ज़ोन्य द्राव नँन्य पॉठ्य रँन्य गिलुवन ॥

१४२

स्वर्गु हूर स्वनु कूर द्रायि पोत दारे  
रतु बॉरव ऑस्व वतु डुवन ।  
बँट्टु दून्य सँट्टु खँच सुमु सवारे

शीनु डबि ज़ूनु दारि कृष्णु मिलुवन ।।

१४३

नखुक नरकोन मखु क्यथु दरे  
हख दिनु परे तोतु क्या राम ।  
फवलि मा बुमि पोश ह्वछिमुच्चि थरे  
मोत ब्यूठ गरे लरि क्याह क्राम ।।

१४४

कुस छु पनुन कुस छुय ब्याख  
खेलिस श्राख कलस प्यठ ।  
कस आख बागुन्यु कॅमिस ज़ाख  
बैयिस बाख पानस नठ ।।

१४५

नठ नदहरनि यठ लगी पानस  
डलि ऑनु खानुच पॉरी ज़ान ।  
प्रलयिकि प्रचंडु खस आयस्तानस  
रुच्चि गरि ग्वडु सरि पुशरुन पान ।।

१४६

खडु मॉड्य सिपाह कलुहेरि डेरन  
हरदु कालु नेरन वीर्यन पोश ।  
ग्वडु कॅर्य गरदनि मीलु पचि बेरन  
सॉतु वावु यीरन दरदु हरदु रोछ ।।

१४७

नख ह्यन नकुल्यु, वख गछि ग्वबन  
ज्यव यियि लबन नोव नवि रोश ।  
पानु पुछ्य पॉराव तोशिखान दूबन

कोछ रटि नबस कौड गछि पोश ॥

१४८

शीसि डबि तालव नखु खसि जून  
पकनस घीन्य बुनिल्य यठ ।  
अंदु अंदु मून्य चोर मंजबाग च्यून  
ग्यवु क्रैजि डून, वारिल्यन कठ ॥

१४९

ग्राकन गूल्य, श्राकन हूल्य  
माहरेन्य डूल्य वौरिव गॅयि ।  
मौल्य सुंज नु मनन, माजि हुंज नु बूल्य  
अँक्य खेयि ठील्य, पोत वौल्य पेयि ॥

१५०

गुपन गानस पॅहॅल्य नयि  
मूलन यंगु पॅत्रन सयि ।  
पॅथरिस क्वमु लूकन खयि  
गामस अँहरु, पानस बयि ॥

१५१

युथ नो बावख, बतु लेज ख्यावख  
कावु सुंजि तौंति दरि मा माल ।  
अँदुर्य थावख, पानस छावख  
मैडि मैडि ख्यावख सबे साल ॥

१५२

वुफि युन नखे राजस डखे  
अँकिस गरस सास बर ।  
युस यिनु थके, ब्रोंह कति पके

गॉब गछान बॉज्यगर ।।

१५३

करान गॅजगा यथुय पानस  
तथुय ऑनस प्रुछतव ज़ाथ ।  
स्वलबु स्वल सोदा पानु छु वानस  
न तस दूह तय न छस राथ ।।

१५४

असनुचि त्राये वदुन ज़ानुन  
वदुनुचि त्राये असुन ज़ान ।  
शब्दा ग्वरु सुंद हरु सुंद मानुन  
ग्वरु पादन वंदुन्य् प्रान ।।

१५५

स्यंदु बलय व्वंदु छोलुम  
मकय दॅरुम साँकयराथ ।  
अमर नाथुय सातय फोलुम  
शक्ती सोरुम कुलि कायनात ।।

१५६

तोमुल, पोन्त्य्, तील नून कॅरुम वॅरुय  
मनशय कोरुम गणिशस साल ।  
तुंबु नॉर शंखु डोल, छ्वन्य् छ्वन्य् हॅरुय  
शिवस त्रॉवुमँ जुवय माल ।।

१५७

कंगस बंगु तय ज़्युन हंगस  
रंगय रंगुन क्वंगय पोश ।  
रंग हे रंगनुक सादु संगस

हंगु ज़ाल ज़्युन तय क्वंग दियि जोश ॥

१५८

यमस दूहु अकि वोनुय ब्रमन  
चमनस म्याँनिस कज़ख पोश ।  
यमन दोपुस म रोज़ खमन  
तावय तौविथ डालख रोश ॥

१५९

ज़ारस गिंजोम ज़ेनुचि प्रये  
ब्याज़ गव थोद तय खोतुम बोश ।  
साज़ाह वायोम बोज़नुचि लये  
राज़ु बलु वाज़ु वानु डॅलिम होश ॥

१६०

रंगु मंदोर्यन दितिम गतय  
पॅतिमि वतय मॅशिथ गॅय ।  
ताह ताह खोरुम माज़ु तु रतय  
शाह गॅयि छ्यतय वती रॅय ॥

१६१

छिट्टु होर वुछुम आसमानाह  
ककव जूर्याह पकस ऑस ।  
वाँट्यु होल चाँट्यु खोल कतरि बानाह  
ब्रमु बोज़ दाना ख्यथ गॅयि रॉस्यु ॥

१६२

लोलु दोनि मंज़ ख्वनि रटि युस व्वटे  
ज़ेवे अमृथ छटे सुय ।  
ब्रह्मांडु वुज़मलि रव युस रटे

कालुनि ज़ालु कति नटे सुय ।।

१६३

चुय अय अटु तय चुय मंज़ गारस  
च्यतु व्दि यारस सटु अदु क्याह ।  
च्येय मंज़ फाटुविथ चुय प्यठ तारस  
च्ये तु बॉज़्युगारस यिकुवटु क्याह ।।

१६४

त्रु सैदि श्रान कर ज़ान कर गारस  
पृथवी आकाश मिलुविथ दून ।  
शेश्तर्य नार ज़न अछ चंदन दारस  
वसि मदु बनि अदु पारस स्वन ।।

१६५

कुस छुख पानय कॅमिस ज़ाख  
कते आख गछुन कोत ।  
सुय येलि पानय तस कुस ग्राख  
अदु कुस ब्याख कॅम्य् अदु ह्योत ।।

१६६

ब्रमस ब्रह्मुक ब्रम कवु प्योयो  
सॉर कवु लॅजयो बॉर खर ज़न ।  
ज़हरस अमृथ ब्रोंत कवु गोयो  
खेय खेय चॅल्य् नो यमस खन ।।

१६७

कलि मल च़लि अदु पोन्य् वुज़ि नागस  
चु च़मि, बु हमि नोव नवि जोश ।  
गोशि गोशि पलजुन आत्म आगस

अदु लल त्रागस फ्वलि होशि पोश ।।

१६८

हुजत करुनी तस क्याह वेचे  
युस रचि रचे तु कचे छुय ।  
चेनुवन दिवान वंदु तय हचे  
कस कूत पचे ज्ञानान सुय ।।

१६९

कुस सनु नरुख तय क्याह सनु स्वर्गस  
च्यतस त्वर्गस चेनान गछ ।  
ब्रह्म सरु वारु पर बॅर्गस बॅर्गस  
हथ बर दूरगस प्रथ बरु अछ ।।

१७०

ठोठ मे द्युतुम बठिके आये  
सीरु सर, वीरु बल, यीरु ज़न गोम ।  
होट मे दिचोम कटु संजि त्राये  
गारुचे माये औद कुन प्योम ।।

१७१

नोटाह तुजोम नागुचि राये  
मदुचे माये पातौल्य् प्योम ।  
व्वठ मे लौयिम त्रेटि हुंदि आये  
ग्वरु कृपाये अथु रोट गोम ।।

१७२

रंगु रौंगुम रंगुचे माये  
गोट गोम पोट नवि रंगुन प्योम ।  
रंगुर्य रौंगुम बे रंगु आये

बे रंगु रंगस क्वंगुय गोम ।।

१७३

लयिचे लाकमि ख्वये खोरुम  
वगे रोटुम द्युतुमस फेश ।  
च्चथुय च्चोबुम च्चंद्रम दोरुम  
दिवय प्रॉवुम त्रोगुन वेश ।।

१७४

क्रकु मे दिचमस कुने नावे  
क्याह अदु श्रावुनु या अदु कोह ।  
सोरुय तोरुम कुने दावे  
शीरिम बाल तय हूरिम क्रोह ।।

१७५

अंदर बिहिथ चाकय वारे  
कुनुय स्वरे द्यन क्यो राथ ।  
वेज़ ब्द व्यगलन तील ज़न दारे  
यमु बय हारे इन्द्रस माथ ।।

१७६

गाडु ज़ाल रटि क्याह पानि रोस आरन  
मंज़ छंबु छारन दरि क्याह ठोठ ।  
ब्रॉत्पु द्यव पच्चि क्याह तस नय मारन  
द्यारु फोत्पु नारन शाह रगि नोठ ।।

१७७

अँछन बीठिम तेह अंबर  
वछस दितिम हचिव्यु कॉन्पु ।  
गाश ज़ोनुम संसॉर्यु बंबर

दार फाटुव पनुन्य् पॉन्य् ।।

१७८

ककव बूल्य् गॅयम कनन  
समुहार्य मानन कॅडुम कल ।  
कुकिलि बोलि त्रास ह्योत मनन  
ह्यस प्यव ज्वनन मानसबल ।।

१७९

कावु कले क्वले त्रॉविथ  
ब्वद मनस ख्यॉविज्जि क्याह ।  
वावु जामन पॉरॉविथ  
नावु रॅस्यत्युक बॉव्य्जि क्याह ।।

१८०

वुठिथ वॉलिंज बहुनॉवुम  
अँदुर्य छेवुम पानस पान ।  
पनुन आसुन पानय प्रोवुम  
पानस लॉयिम पानय कान ।।

१८१

पानय ज्ञानुन पानस ह्युवुय  
यसुय ज्ञाख तसुय ज्योव ।  
न छु शवुय न छुस जुवुय  
म्वखन बदलिथ नवम नोव ।।

१८२

सीर बस्तुय पान ज्ञानुन  
यावुन ज्ञानुन श्रावनु शीन ।  
वारु छॉनिथ फ्यारु फ्यानुन

सतन गुर तय हतन ज़ीन ।।

१८३

दँहवुन्यु हसत्यन लाकम येमिस  
प्रणव कमान तय प्रान कान यस ।  
क्वछि सुय राजस ब्वछि कति तँमिस  
तँम्यु चव दामु दामु आनंद मस ।।

१८४

मेच्चे मेच्युय वुछिम क्वछे  
मेच्युय मेच्चे ख्यावान जुव ।  
मेच्चे वुछिम मेच्चे हुंज ब्वछे  
मेच्युय मोच्चेथ ज़ोनुम शिव ।।

१८५

मेच्युय ज़ोनुम आत्म आकाश  
मे च्चे वुछुम मेच्चे हुंज प्रय ।  
मे च्चे वुछुम सासु सिरियि प्रकाश  
मे च्चे वुछिम शक्ती लय ।।

१८६

सिरियुक प्रकाश प्राणय ज़ोनुम  
आत्म ज़ोनुम द्यानुक द्यय ।  
पवुनुक दवुन ग्यवुनुय ज़ोनुम  
पानस पानय गँछिथ लय ।।

१८७

पांजुन पॉतुर बार ज़न मन प्योव  
आवुठ पन गव वोनव क्याह ।  
व्वंदुक्यन सीरन कुलफु रोस दनु गौव

हेलि रोस अन्न गव लोनव क्याह ।।

१८८

अदुर्य मैङ्ग्य वॅन्म्य मोदुर्य ख्योवुख  
पानस वोयुथ पानय डोल ।  
शाहबाज़ु यँदराज़ु वॅन्म्य वीरु पोवुख  
तस सीर सरु गव येम्य पान गोल ।।

१८९

पां लेजि गजि तावु म्वख्तु कवु अंदे  
तोमलस सँदरु मंजु यिया छाव ।  
होल अदु गछि क्याह लोलु रोस वंदे  
लोगु हुंद तोगि वुर ज़गि प्रुछ बाव ।।

१९०

छ्वह येलि लोगुम, छ्वह अदु मँशिम  
छ्वख दिथ गुशुम पनुन पान ।  
पनुने ग्रटु बलु पान येलि प्युशुम  
सुय येलि च़ुशुम गँयम ज़ान ।।

१९१

बिंदुय मोच्चिथ रिंदय नच्चे  
पानय बोज़ि पनुन ग्योव ।  
वखतबु त्रॉविथ अखतबु म्वच्चे  
तस क्याह वेच्चे यस युथ प्रोव ।।

१९२

आत्म राज़स मन कर लये  
बंदन म्वख्ती मनुक ब्रम ।  
यछ पछ दूढ ऑनस नु खये

आदि औंथ नये सुय सूहम ।।

१९३

अकुय येम्य् ज़ोन सुय गव यँच्युय  
सुय प्यव प्रँच्युय वुहुवुन पान ।  
अद्वय आत्म राज् यस मोच्युय  
तस ज्ञानु विज्ञानु पानु शिव ज्ञान ।।

१९४

यस्युय ख्वनि तस्युय ज़ाख  
तस क्या नाव ज़ाने कोह ।  
यसुंद सौरुय तस्युय ग्राव  
नाहकय लूब लांगुर्य मोह ।।

१९५

संसार ब्रम् बॉज्य् सॉरी मानन  
असलुक ज़ानन ज़गि मंज कांह ।  
च्यतु र्रँच शांत यस संकल्फु फानन  
ज़गि ब्योन नु ज़ानन पानस ज़ांह ।।

१९६

मस पानु मस ह्यथ मसु मँचरावान  
खंबुकुय काँसि नु पावान पय ।  
यस युथ ह्यस यियि तस त्युथ चावान  
पनुने वानय पानय च्चु दय ।।

१९७

नय छुस पाफ तय नय छुस प्वन्य्  
नय छुस आराम नय सफरन ।  
नय छुय ज़ोन तय नय छय ज़ँन्य्

नय छुस हरुद तय नय सौतरन ॥

१९८

नय छिस ग्वन तय नय बे ग्वन  
नय छुय कुन तय नय छुय दून ।  
नय छुय आगुर नय छुय वन  
नय छुय हेरि कुनि नय छुय ब्वन ॥

१९९

नय छुय फाकय नय छुस ख्यन  
नय सुत्त्य् जिंदन नय म्वर्दन ।  
नय छुस ब्यन तय नय छिस र्यन  
नय छुय नार तय नय तुरनन ॥

२००

हर फन मोला हर जॉन्य् ज्वन  
शेनुवुन्य् तरफन बासु बासन ।  
नय कुनि अँछ लागि नय कुनि कन  
सारिनय सौरिसुय मंज हन हन ॥

२०१

नय मँस्चि नय मारुनावान  
नय जिंदय नय जिंदुनावान ।  
नय रॉविथ नय रावुरावान  
बस छु गिंदान तु गिंदुनावान ॥

२०२

त्रेशवय तह दिथ हेरि क्योहो ब्वनय  
लोहरनु यिवान तह बर तह ।  
यूताह सनुय त्यूताह ग्वनुय

कितु यियि वोनुय वुछुम क्याह ।।

२०३

मनि कास ज्वलय हवा तारु क्वले  
बुमि तारु दरस वस बवुसरस ।  
पकू थलि थले चंद्रम फ्वले  
छलु अछु बरस जूल मानसरस ।।

२०४

सर रठ गले आसुन चले  
तुर तथ नारस सोंतु पतु बहारस ।  
फेर हलि हले सास बास फ्वले  
मेल बा यारस चु ति तथ शुमारस ।।

२०५

वुछ वुछ वुछ लगन दनस  
अंद मनु लागि क्यथु बेयि संज्र छाल ।  
पानय अय फनकार नियि कुस फनस  
वेज्र कुस चूर फरि चे नु स्वनुमाल ।।

२०६

पॉन्य पानय पान रावरोवुम  
पॉन्य पानय ह्योतुम पथ ।  
पॉन्य पानय यँदर्यन ख्योवुम  
पॉन्य पानय हॉरुम सथ ।.

२०७

गोल गतव गनिरु गीरिथ  
शीरिथ थॉविम पनुन्य प्राण ।  
शहु हॉकल गगु नीरिथ

गुतु फीरिथ अमृतु श्रान ।।

२०८

चुय अय आकाश चुय अय पाताल  
चुय अय गटु गाश च्चैय ह्युन ह्योन ।  
चुय अय रखिपाल चुय अय मुहु ज़ाल  
चुय अय दयाल तु अदु कोनु नोन ।।

२०९

लँदरस बँदरुपीठ तल पातालस  
सँदरुक आगुर प्यठ आकाश ।  
मंज़ कनि जाया ग्रासुक्य कालस  
ज़ीवु जंजालस पिह्य पिह्य नाश ।।

२१०

कालु च़क्रस रँटिथ नालय  
अंदु अंदु वछस गंडय हाह ।  
सेमंज़ लछि बज़ु तारख मालय  
बालु पतु बालय गाहु पतु गाह ।।

२११

न छुस अंदय न छुस ओंतुय  
अदु किथु वोंतुय लब्यस कांह ।  
छांडान गछन कल्पु क्रोंतुय  
न छुस मोतुय न ज़ेवि ज़ांह ।।

२१२

वछस अंदर रँटिथ खँटिथ  
पॉन्य पानस त्रावान ज़ाल ।  
मचे अंदर मँटा वँटिथ

ज़चन चॅटिथ दिवान लाल ।।

२१३

मेच्चे वुछमय चॅट्टुचि ख्वये  
मेच्चय वुछुम पूर दर पूर ।  
मेच्चे वुछमय अमृतु ज्वये  
मेच्चय वुछुम नु पानस दूर ।।

---

# वाख

## व्यथ मा छि शॉंगिथ

### बिमला रैना

=====

**Transformed into Standardised Devanagari-Kashmiri Script by  
M.K.Raina, Vasai, Mumbai with due permission from the author.**

**My sincere thanks to her.**

**Work completed on 12.02.2005.**

=====